

ANTSO FIARAHAMONINA KRISTIANA (AFK)

Mila averina jerena ifotony ny fampianarana sy fanabeazana eto

Miankina amin'ny fampianarana sy ny fanabeazana ny mahatsara sy mahaso ny firenena. Raha atao ankilabao sy an-tsiram-bina ny seha-panabeazana sy fampianarana sy ireo mpisehatra fototra toy ny mpampianatra sy ny mpianatra, dia hikorosy fahana ny fiainam-pirenena sy firenena amin'ny ankapobeny mihitsy. Iaraha-mahalala, fa ny seha-pampianarana eto amin'ny firenena dia maro olana tokoa, ary miseho lany hatrany izany mandraka ankehitriny. Saika ny ambaratonga rehetra no ahitana izany, na amin'ny fampianarana ankapobeny na teknika, na eny amin'ny ambaratonga ambony izay tena mive-rimberina ny olana, ary mitatao mihitsy aza amin'izao fotoana izao ny taona fotsy. Mazava loatra fa misy fiantraikany



Nopotehan-dry Rajoelina ny fampianarana sy ny fanabeazana eto.

amin'ny fari-pahalalan'ny mpianatra izany na tiana na tsy tiana. Izy ireo izay ambara mandrakariva ho hoavin'ny firenena. Azo hevitreverina amin'izany ny zava-hiseho eto amin'ny firenena raha izao tranga izao no mitohy. Tsy any amin'ny sekoly toy izany ihany anefa isian'izany olana izany, fa na any amin'ny seha-

pampianarana hafa ihany koa aza dia ahatarafana izany. Anisan'izany raha ny nambaran'ny mpamakafaka ny eny anivon'ireo sekoly manofana miaramila na polisy na indrindra zandary manoloana ny zava-misy amin'izao fotoana izao. Misy lesoka any amin'ny seha-piofanana matoa izao no zavatra ataon'izy ireo, hoy ny

mpamakafaka, satria hita mibirioka na miàla tantaraka amin'ny lalana tokony hizorany izy ireo, dia ny fiarovana ny vahoaka sy ny fananany, ary ny tanindrazana. Ny tanindrazana kanefa ity tadiavina homena ambongadiny amin'ny mpitondra frantsay manafo politika maloto eto, izay te higoka hatrany ny harem-be sy tombontsoa azony hatramin'izay. Toa tsy mivakylaha amin'izany hahaverezan'ny tanindrazany izany izy ireto. Tsy maintsy avotana ny firenena, fa tsy avela ho potika sy horobain'ny vahiny. Mila mijoro ny tena kristiana mandàla ny fahamarinana sy manohitra ny tsy rariny sy tsy hitsiny ary ny fahalovana eto amin'ity firenena ity. Mila fiarahamonina vaovao i Madagasikara. Fifandraisana: 034 17 460 53.

Aris

FMF 2023 – 2027

Tontosa tamin'ny alakamisy ny famindram-pitantanana

Vita ny fampindram-pitantanana, tsy teny amin'ny foibe toeran'ny FMF eny Isoraka no natao ny lanonana, fa fanambarana tamin'ny fomba ofisialy nataon'ny Vaomieram-pirenena misahana ny Fifidianana FMF sy ny Vaomieran'ny Fampandrenesana an'io rafitra io ny vokatra ny fifidianana mpikambana vaovao ao amin'ny FMF « Federation Malagasy de Football » notanterahina teny amin'ny Novotel Ivandry tamin'ny sabotsy 14 oktobra 2023 lasa teo sy ny famindram-pahefana avy amin'ny filoham-pitantana vonjimaika nandritra ny fotoana voafetra, Andrianony Victorien sy ny filoha vaovao Randriamanampisoa Alfred, fa teny amin'ny tranon'ny fivorian'ny kianjan'i Mahamasina. Nanomboka tamin'io andro io izany (alarobia 18 oktobra) ary haharitra efa-taona ny fotoam-piasan'ity mpitantana vaovao'ny FMF ity. Marihana fa tamin'ny alahady 15 oktobra teo dia efa nihaona tamin'ireo solontenan'ny FIFA ny filoha vaovao'ny FMF, ka nanamafisan'ity rafitra ny ampahany amin'ny tetikasa hatao eto Madagasikara hampandrosoana ny baolina kitra, ka anisan'izany ny fanomezana fiara fitateram-bahoaka ho an'ny Barea, ny fanarenana sy fanitarana ny fijoroan'ny kianja Carion sy ny kianja Rabemananjara ao Mahajanga, ary



Teny amin'ny efitrano fivorian'ny kianjan'i Mahamasina.

ny fametrahana jiro ao. Fantatra tamin'io andro alakamisy io ihany koa, fa mbola hijanona ho mpanazatra ny Barea ny Coach Rôro mandritra ny fanatanterahana ny fifanintananana « Can Maroc 2025 », araka ny nambaran'ny filohan'ny FMF.

Rainilita

Federation Malagasy de VolleyBall

Nitsidika ny tany Sava

Nitsidika ny tany Sava ny avy ao amin'ny FMVB « Federation Malagasy de VolleyBall », ka nanatanteraka fihaonana tamin'ireo mpankafy Volleyball sy ireo tompon'andraikitra maromaro any amin'ny Faritra Sava, tany an-toerana ny Sekretera jeneraly Raharinjoelina



Tany Sambava Centre.

Fetison Hajatiana, niaraka tamin'ny DRJS, Tilahisanga Jean Orelie sy ny lehiben'ny sampandraharaham-paritra amin'ny fampandrosoana ny fanatanjahatena Faritra Sava, Rabearisoa Louis. Ny famerenana indray ny lanjan'ny volleyball Malagasy, izay asa goavana fanambin'ny FMVB tarihan'ny filohany, Raharimalala Léa, ankehitriny, no tena tanjona nokendrena tamin'ny fihaonana, ka tao amin'ny biraon'ny talem-paritry ny Tanora sy ny Fanatanjahantena Sambava Centre, no natao ny fihaonana tamin'ny zoma 12 oktobra teo. Norezahana nandritra an'ity fihaonana ity ny amin'ny tokony hidiran'ireo klioba samihafa eo amin'ny sehatry ny ara-dalàna, ka hakan'izy ireo "certificat de conformité", eo ihany koa ny famporisihina ny fampivondronan'ireo klioba ho lasa Ligy, mba hahafahan'ny Federasiona manampy azy ireo ary indrindra ny fihainoana ny hetahetan'ireo mpitia ny volleyball. Hitohy amin'ny Faritra maro ny asa fanentanana hataon'ny Federasiona Malagasy ny Volleyball, mba hanarenana ny taranga Volleyball Malagasy.

Rainilita

Taratasin'ny mpamaky

Fampahafantarana alefa amin'ny rehetra izao taratasy manaraka izao. Ny FIARA 4x4 MERCEDES BLINDÉE 6677 TAC an'ny filoha Marc Ravalomanana.

Efa tany amin'ny taona 2000 tany no nividianan'ny Fianakaviana Ravalomanana ity fiara 4x4 Mercedes blindée ity, ary roa mitovy amin'io no ananany. Ny isa 77 amin'ny laharan'ny fiara dia manamarika ny taona 1977 nampiroborobo ny orinasa TIKO, sy nahazoany fiara voalohany (77 ihany koa ny fiakaran'ny laharan' ilay fiaran'ny voalohany). Tamin'ny taona 2002 dia efa ity fiara ity no nitondra ny Filoha Ravalomanana teny amin'ny kianjan'ny 13 mai sy nampiasainy. Mbola ity fiara ity ihany koa no nitondra azy sy ny ankohonany nandritra ny fampielezankavity 2006. Nandritra ny fanonganam-panjakana 2009 dia nisy naka ny fiara mercedes roa an'ny fianakaviana Ravalomanana ary tamin'ny taona 2017 vao fantatra, fa i Alain Ramaroson no naka sy nitaona ireo fiara mercedes roa ireo. Rehefa voaheloka higadra i Alain RAMAROSON dia ny vadin'ity farany no tonga teny Faravohitra niresaka tamin'ny Filoha Ravalomanana, nilaza fa haveriny ny fiara roa raha manome vola mitentina "400 millions fmg" azy ny Filoha RAVALOMANANA, saingy tsy nanaiky ny Filoha Ravalomanana, fa avy hatrany dia nanao ny "procédure" rehetra ary nandefa vadintany teny Andoharanofotsy naka ny fananany, ka niverina tamin'ny ireo fiara roa ny volana janoary 2017. Simba moa ireo fiara roa ireo ka nalefa avy hatrany tany Allemagne namboarina. Ankehitriny dia mbola ampiasain'ny Filoha Ravalomanana Marc ity fiara ity ary tsy foiny, mbola matanjaka tsara rahateo ilay fiara na dia efa aman-taonany maro aza.

Malagasy tsara

Championnats Nationaux de basket N1A, 2023

Ho tontosaina anio sabotsy ny fanokafana ofisialy

Anio sabotsy 21 oktobra 2023, no hotontosaina etsy amin'ny Lapan'ny Fanatanjahantena Mahamasina, ny fanokafana ofisialin'ny fifaninanana basikety « Championnats Nationaux N1A, 2023 » raha efa tamin'ny alakamisy 19 oktobra lasa teo, no nanombohan'ny andro voalohany. Marihana fa ny fifaninanana na ny « TOP 8 Hommes et 2è et Phase finale Dames » no tanterahina amin'izany, ka arak'izany dia miisa 8 ireo ao amin'ny sokajy lehilahy ary 10 ireo ao amin'ny sokajy vehivavy. Voka-dalao sokajy lehilahy andro voalohany : Ascute Atsinanana 37 - 50 As Fanalamanga Alaotra Mangoro, Gnbc Analamanga 83 - 52 Bcb Boeny, Tgbc Betsiboka 69 - 67 Bbc Vakinankaratra, Cospn Analamanga 93 - 50 Mbc Atsinanana. Ny andro faharoan'ny fifaninanana no notontosaina omaly zoma 20 oktobra 2023 ka ny sokajy vehivavy no efa nahazoana vokatra : Ascute Atsinanana 63 - 55 Ankaratra Vakinankaratra, Tgbc Boeny 60 - 74 Mb2Al Analamanga, Gnbc Analamanga 89 - 25 Serasera Vakinankaratra, Fandrasa Matsiatra Ambony 71 - 81 Tamifa Amoron'i Mania. Anio sabotsy 21 oktobra 2023, izay hanatanterahana lalao miisa 9 be izao (sokajy lehilahy 4 ary sokajy vehivavy 5), no hanatanterahana ny lanonana fanokafana ofisialy an'ity hetsika ity (amin'ny 4ora latsaka fahefany tolakandro). Rahampitso alahady 22 oktobra indray dia hiverina amin'ny lalao miisa 8 no hotanterahina etsy Mahamasina (lalao 4 lehilahy ary 4 vehivavy).

Rainilita



Championnats Nationaux de basket N1A, 2023.